

全唐诗卷一百三十五

卷 135_1

【冬夜寓居寄储太祝（一作薛据诗）】綦毋潜

自为洛阳客，夫子吾知音。
尽义能下士，时人无此心。
奈何离居夜，巢鸟悲空林。
愁坐至月上，复闻南邻砧。

卷 135_2

【春泛若耶溪】綦毋潜

幽意无断绝，此去随所偶。
晚风吹行舟，花路入溪口。
际夜转西壑，隔山望南斗。
潭烟飞溶溶，林月低向后。
生事且弥漫，愿为持竿叟。

卷 135_3

【题鹤林寺】綦毋潜

道林隐形胜，向背临层霄。
松覆山殿冷，花藏谿路遥。
珊珊宝幡挂，焰焰明灯烧。
迟日半空谷，春风连上潮。
少凭水木兴，暂令身心调。
愿谢携手客，兹山禅诵饶。



卷 135_4

【题栖霞寺】綦毋潜

南山势回合，灵境依此祝。
殿转云崖阴，僧探石泉度。
龙蛇争翕习，神鬼皆密护。
万壑奔道场，群峰向双树。
天花飞不著，水月白成路。
今日观身我，归心复何处。

卷 135_5

【送储十二还庄城】綦毋潜

西坂何缭绕，青林问子家。
天寒噪野雀，日晚度城鸦。
寂历道傍树，曈曨原上霞。
兹情不可说，长恨隐沦赊。

卷 135_6

【送章彝下第】綦毋潜

长安渭桥路，行客别时心。
献赋温泉毕，无媒魏阙深。
黄莺啼就马，白日暗归林。
三十名未立，君还惜寸阴。

卷 135_7

【送崔员外黔中监芽】綦毋潜

持衡出帝畿，星指夜郎飞。
神女云迎马，荆门雨湿衣。
听猿收泪罢，系雁待书希。
蛮貊虽殊俗，知君肝胆微。

卷 135_8

【送贾恒明府兼寄温张二司户】綦毋潜

越客新安别，秦人旧国情。
舟乘晚风便，月带上潮平。
花路西施石，云峰句践城。
明州报两掾，相忆二毛生。

卷 135_9

【送宋秀才】綦毋潜

冠古积荣盛，当时数戟门。
旧交丞相子，继世五侯孙。
长剑倚天外，短书盈万言。
秋风一送别，江上黯消魂。



卷 135_10

【送平判官入秦（一作卢象诗）】綦毋潜

谪远自安命，三年已忘归。
同声愿执手，驿骑到门扉。
云是帝乡去，军书谒紫微。
曾为金马客，向日泪沾衣。

卷 135_11

【送郑务拜伯父】綦毋潜

名公作逐臣，驱马拂行尘。
旧国问郢子，劳歌过郢人。
一川花送客，二月柳宜春。
奉料竹林兴，宽怀此别晨。

卷 135_12

【题招隐寺绚公房】綦毋潜

开士度人久，空岩花雾深。

徒知燕坐处，不见有为心。
兰若门对壑，田家路隔林。
还言证法性，归去比黄金。

卷 135_13

【宿太平观】綦毋潜

夕到玉京寝，宦冥云汉低。
魂交仙室蝶，曙听羽人鸡。
滴沥花上露，清冷松下谿。
明当访真隐，挥手入无倪。

卷 135_14

【题灵隐寺山顶禅院】綦毋潜

招提此山顶，下界不相闻。
塔影挂清汉，钟声和白云。
观空静室掩，行道众香焚。
且驻西来驾，人天日未曛。

卷 135_15

【若耶溪逢孔九】綦毋潜

相逢此溪曲，胜托在烟霞。
潭影竹间动，岩阴檐外斜。
人言上皇代，犬吠武陵家。
借问淹留日，春风满若耶。

卷 135_16

【宿龙兴寺】綦毋潜

香刹夜忘归，松青古殿扉。
灯明方丈室，珠系比丘衣。
白日传心静，青莲喻法微。
天花落不尽，处处鸟衔飞。

卷 135_17

【题沈东美员外山池】綦毋潜

仙郎偏好道，凿沼象瀛洲。
鱼乐随情性，船行任去留。
秦人辨鸡犬，尧日识巢由。
归客衡门外，仍怜返景幽。

卷 135_18

【茅山洞口】綦毋潜

华阳仙洞口，半岭拂云看。
窈窕穿苔壁，差池对石坛。
方随地脉转，稍觉水晶寒。



未果变金骨，归来兹路难。

卷 135_19

【过方尊师院】綦毋潜

羽客北山寻，草堂松径深。
养神宗示法，得道不知心。
洞户逢双履，寥天有一琴。
更登玄圃上，仍种杏成林。

卷 135_20

【经陆补阙隐居】綦毋潜

不敢要君征亦起，致君全得似唐虞。
说言昨叹离天听，新象今闻入县图。
琴锁坏窗风自响，鹤归乔木隐难呼。
学书弟子何人在，点检犹存谏草无。

卷 135_21

【登天竺寺】綦毋潜

郡有化城最，西穷叠嶂深。
松门当涧口，石路在峰心。
幽见夕阳霁，高逢暮雨阴。
佛身瞻绀发，宝地践黄金。
云向竹谿尽，月从花洞临。
因物成真悟，遗世在兹岑。

卷 135_22

【满公房】綦毋潜

世界莲花藏，行人香火缘。
灯王照不尽，中夜寂相传。

卷 135_23

【过融上人兰若（一作孟浩然诗）】綦毋潜

山头禅室挂僧衣，窗外无人溪鸟飞。
黄昏半在下山路，却听钟声连翠微。

卷 135_24

【早发上东门】綦毋潜

十五能行西入秦，三十无家作路人。
时命不将明主合，布衣空染洛阳尘。

卷 135_25

【祇园寺】綦毋潜

宝坊求往迹，神理驻沿洄。
雁塔酬前愿，王身更后来。



加持将暝合，朗悟豁然开。
两世分明见，馀生复几哉。

卷 135_26

【送集贤学士伊阙史少府放归江东觐省（一作陶翰诗）】綦毋潜

墨客钟张侣，材高吴越珍。
千门来谒帝，驷马去荣亲。
吏邑沿清洛，乡山指白蘋。
归期应不远，当及未央春。

